

~~ONE 5450.2~~

T 5464 / 83 B

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

JUN 28 1932

二

5

卷之三十二

海軍

海軍

乙酉五月復奉

令自癸未

以暴

乙酉五月復奉

吉

萬

乃元

乃元

乃元

乃元

乃元

乃元

敬業堂詩集卷三十二

海寧 查慎行



考牧集

起乙酉五月杪
盡丙戌四月

余自癸未扈

蹕清暑甲申以纂輯韵府留京師

乙酉五月復奉

旨隨駕是秋撤圍後 萬乘巡

邊別由雍安嶺渡庫勒齊河自此抵張家口乃元

時上都孔道今屬

上駟院慶豐司數百里間岡

勢坦迤駝馬牛羊約三百餘万

上按程閱視指

諭臣等云昔

太宗皇帝謂此地宜畜牧今果蕃

息若此遂頒

賜侍從大小臣工人各馬一匹羊

二頭臣亦與焉又四百里始入居庸關臣惟小雅

之美周宣曰誰謂爾無羊三百維群誰謂爾無牛九十其犉我 國家考牧之盛不啻千伯倍之詩書史冊所載得未曾有特取此義以紀盛事云

扈從山莊避暑出都口占

又是山莊扈蹕時 賜衣重著馬重騎邊人望幸經初伏閏歲 君王避暑遲

雨後過懷柔城外

火雲突兀壓城頭地近黃花古戍樓好是綠陂新過雨路平如掌接檀州

重出古北口

烟火千家散舊屯饋漿野老候關門自言世得耕耘力

黃犢年來又有孫

曉過青石梁新開路

高入雲端俯作梁中間鑿石得康莊松聲落澗風泉合藥氣浮山露草香馬爲重經成熟路人貪早度取微涼詞臣例飽 天廚饌已有中官候道旁

鞍子嶺直廬庭西新設松棚

十丈移岩壑三間蔭苑牆有時松子落隨意乳毛香不礙流晨露尤宜障夕陽天教人夏健何減北窗涼

發黃甲營喜晴

青浮翠積氣氤氳曉色俄從霽色分馬首已迎初上日雕翎猶帶未歸雲峰皆似染供屏幃樹不論年絕斧斤

曾記上番隨

蹕候灤河新漲隔山聞

癸未六月過此連值大雨

咏金絲桃應 皇太子令

裝束渾疑出道家川原何用覓紅霞偶分高士籬邊色
仍是仙人洞裏花金粉露涼朝蝶夢檀心香颭午蜂衙
尋來莫怪漁舟誤比似桃源路更賒

駐蹕樺榆溝特給官房止宿感 恩恭紀

千帳連雲並出關受屢何幸預清班炎埃氣隔無三伏
覆載 恩深抵万間新瓦鱗鱗宜聽雨短牆面面好看
山風餐露宿原臣分每被殊榮輒汗顏

發樺榆溝從新開石梁至哈喇火屯

鑿開峭壁轉龍腰高棧中縈綫一條石叻仰歎泉作霧

雲根倒拔樹干霄向來紆徑千盤轉此去前村十里遙
真覺太平民樂業山南山北盡漁樵

塞外草花暑月特盛同年蔣酉君用橫幅寫七十餘種呈院長揆公以絕句屬和四首

頻年隨 輦到邊庭自補山經及水經更借玉堂揮翰
手兼收花草入丹青

折枝一派取阿那木本無多草本多六月塞山猶似錦
不知春色更如何

莫嗔嵇鄭難爲狀莫咲徐黃欠寫生到此始知天地大
野芳無數總無名

風翻雨洗枝枝別儷白駢紅色色新誰似先生工體物

好詩能發畫精神

恩賜 御書扇恭紀

聖藻光騰寶笈中五明開處潤濛濛
招攜滿苑松杉氣披拂微涼殿閣風
鵲羽午搖炎熾散麝煤香迸汗珠融
捧歸當暑先珍襲篋笥緘 恩託始終

古今注舜廣開視聽求賢人以自輔作五明扇漢公卿皆用之拾遺記周時外國獻丹鵲拾其脫羽以為扇名為鵲扇

烏城立秋和同年佟淵若韻

万壑含朝雨千岩斂夏雲炎涼雖迥判
晝夜漸平分爽自披襟得聲先隔樹
聞候蟲吟較晚高唱獨輸君

立秋後一日 召遊行宮後苑 賜宴恭紀十

二首

銀河西繞翠微岡紫界東連宛轉墻
一片樓臺先入望蓬瀛遙在水中央

天然圖畫引躋攀盡出 宸衷指點間
岩壑不須多架

構下因流水上因山

神川過雨氣溟濛沙土無痕井脈通
欲識泉源深幾許 輓轡聲轉白雲中

坡陀幾曲接礬頭漸入仙源徑漸幽
忽漫孤雲生兩角

小欄低檻盡如樓

煌煌 禁扁麗中天楹帖分題兩兩懸
万丈光芒爭耀

眼不知旁有好山川

松鶴陰從積翠生泉蘿烟月一時清
以上皆御扁名 每經 御

墨留題處記得旃檀別殿名

帶峰傍石布芳筵夾岸鏗鏘奏管絃山水清音消不得
况從天上聽鈞天

一道清流合兩河醜渠中有半開荷分明太液池邊種
重沐天家万里波

插架排籤滿禁林御床左右列森森行宮仍是圖書
府清暑時時惜寸陰

水精簾幙綠莎茵行過星橋別有津除却澆花無汎掃
就中何處著纖塵

叠砌平階茁露芽近看如錦遠如霞塞垣小草生何幸
開作長春苑裏花

華貂環座盡公侯特許詞臣與宴遊滿引金樽歌既

醉謝恩齊上木蘭舟

敬題御書東坡詩扇為法鴻臚作

七輪松扇早涼天舊句新題御墨鮮不獨侍臣沾渥

澤榮光兼被作詩仙

賦得雲抱兩三峰應皇太子令

万峰齊露頂雲氣欲何之偶遇參差石還縈縹緲姿三
山遙望處二華未開時髣髴應難畫形容况入詩

佛手柑奉旨題畫扇上

名並黃柑種不同巧從佛號示玲瓏菩提證果雙林下
優鉢拈花一指中色映金繩長帶露香開寶掌自生風

聞思大士應微笑披拂先教鼻觀通

恩賜 御書敬業堂扁額恭紀十六的

清暑時多暇行宮日正長 君王親翰墨侍從沐 恩

光是壁皆盈尺如椽總倍常因心成變化運肘示端方

山海峯濤壯龍鸞爪翅張堯文開盛世羲畫掩前王

帝賚優無比臣衷懼莫當身雖依廣夏家本住窮鄉憶

在兒童日親隨子弟行長貧惟立壁短晷或然糠風雨

留先築柴荆指舊莊業傳慙肯構敬止念維桑幸獲支

門戶終難荷棟梁數椽天一角 萬歲字中央隣叟來

扶杖姻親賀滿堂承家期世守祝 國永無疆

七月二十四日五更發波羅火屯始有寒色

臥聽雞鳴已過三起來攬帶上征驂五更寒色風初北

七月邊聲雁已南汨汨乳泉縈暗谷濛濛霧雨染濃嵐

前行漸與圍場近飛騎如雲隔宿探

烏喇帶秋分日作前夕大雷雨昨日微雪故詩

中紀之

朔野秋光少俄驚草木衰大都殘暑退便是蚤寒來天

霽今朝雪山收昨夜雷匆匆裘換葛節序暗相催

度達陰嶺看紅葉

蛇躡猿攀路僅通溪聲忽轉一山紅行來不道秋纔半

已在寒林薄雪中

中秋夜薩勒巴里對月

一片中秋月重經古塞看宮壺傾法醞是夕賜酒果御客夢
警新寒似雪侵髯白疑霜拂帳乾故園諸弟在悵望隔
團圓

八月十七日伊蘇河源雪中聞雷食頃開霽

雲黑初防挾雨來俄看黍谷散寒灰千峯雪作漫天霧
万帳風兼動地雷紅樹一番殘葉盡碧空依舊夕陽開
眼前變幻真奇絕天果難將管見推

隨駕行興安嶺上

橫亘東西路幾千直從遼海控居延盡消伏莽山無樹
不斷靈源地涌泉群牧牛羊量論谷諸藩廬帳列如廛
聖朝不畫長城界一道平岡是九邊

連日扈從由雍安嶺烏蘭哈爾哈至上都必拉

觀圍恭紀八首

連天積素耀威弧鵲血牛翮力盡輸

梁簡文詩控弦因鵲血挽強用牛翮

看取群情齊踴躍一人獲雉万人呼

初分左右儼星奔旋列方圓陣法存千仞岡頭黃纛下

藍旗兩扇合旌門

西僧迎輦列香旛擊盃吹螺動法門番界從來知佛

大而令更識帝王尊

多論那拉之西有喇麻寺西僧一百五人蒙古每一部落供養

一僧俱來迎謁賜銀緞有差

嵯峨高勢拂雲開

天語親聆指示來踏遍峰峰沙似

雪始知身到白龍堆

二十五日隨駕至上都海拉爾臺上諭云此地山形首皆西南

向尾皆東北向
即古白龍堆也

朴渥如飛掠草中

御前突過疾於風萬鈞神藝無輕

發命中仍開射虎弓

獸自成羣鳥自稀網開四面總天機白雲一片平如席
趁取鷓鴣帖地飛

尾同麋鹿首成羶千百黃羊合一羣攔入圍中何所擬
滿灘鵝鴨鬧如雲

豹尾雞翹滿後塵近前傳 旨名儒臣分頒五色離披

羽榮被雕鞍是八人二十六日於固勒班庫特力隨圍
賜翰林官山雉人各一尾

雪中戴青氊大帽 上顧見大咲口占紀之

大于煖耳覆雙肩冰雪騎驢二十年今日重蒙 天一

咲白頭還戀舊青氊

隨 駕閱視羣牧恭紀八首

右接雲中左界遠放來群牧十分膘自從 聖祖開基

遠水草新來分外饒

齊色分花望不窮一群拔萃一群空天生驥驟初無種

只在 君王顧盼中

大漠塵消罷戍屯曾收汗血入關門於今青海無傳箭

字息均蒙豢養恩

肉鞍高出草頭低千百封牛褐色齊漢書注駝背上
肉鞍隆高若封土

俗呼封牛知有泉源在山外但從沙上覓駝蹄

鳥特黃特種各殊駢蹠迭角雜收駒太平畜產閒無用

好入豐年考牧圖

四時邊草閱榮枯，垆谷填谿作雪鋪。一色万群三百万

不曾輕費大官芻。詩疏羊以三百為羣，合三十万計之。則千羣也。今合三百万計之，則万群矣。

邊戶羣歌樂歲穰，素封何必業耕桑。家家賜種滋蕃

息，銀餅渾如秬麥香。唐摭言：宣宗賜韋煥孫宏銀餅，皆乳酪膏之所為，即今乳酥餅也。

蒺藜苑小傳唐監，苜蓿園荒咲漢家。自是累朝無馬政

天留沃壤在龍沙。

恩賜上駟院馬一匹恭紀七言排律十六韵

万里平沙屬慶豐，更申罔命牧駒駮。如茶如火千峯上

為錦為雲一望中。有駮幸隨觀垆野，上襄敢異賜行

宮房星燭地光先，見電影流天澤下。通玉勒金羈，新改

控凋鞍黃帕舊曾蒙。丹青妙合將軍畫，聲價高踰都護

驄。緩轡追陪雙仗近，着鞭先後八人同。南書房侍直八人同，日拜賜。

細看六印猶鈐膊。唐六典：在牧之馬有飛字印、龍形印、三花印、風字印、賜字印、出字印、其形

容端正，擬送尚乘者。乍拂三花待翦髮，不分牽來遊果

下。且教行處避芳叢，疾徐本具馴良性。安穩寧資調習

功，筋力將衰蒙聖鑒。嘶鳴欲效託微衷，院中例借知

應免衆裏齊驅學。漸工躡蹠身輕辭社燕，飛揚隊逐入

關鴻。食貧慙媿薪芻儉，種貴夸張阜櫪空。照夜俄看歸

路白，經春旋試軟塵紅。翔麟苑與飛龍廐，蕃錫恩深

念匪躬。

上御帳殿南門 命侍衛試調生馬 召臣等

同觀恭紀

步濶蹄高齒尚童 尚書大傳 童馬不馳 忽驚一顧出 重瞳賞加

牝牡驪黃外 恩在駟馳駕馭中 杏葉裁韉初被錦桃

花作汗欲噴紅龍洵騏校皆天廐冀野從看万馬空

雪後 賜酥酒恭紀

馬足瓊瑤十里衝到來稠疊 賜黃封土酥點雪脂凝

白官釀消冰乳滴濃寒飲衾稠禁永夜温同狐貂禦嚴

冬銀罌翠杓均天澤醉飽春回草木容

行經獨石口外

獨石西南路最紆時平關隘失崎嶇灤河源在千山外

流過元朝避暑都

下西巴里臺

直下初從万仞顛忽於井底見炊烟松風夜轉潺湲水

知是山腰一眼泉

即事

童子提壺斟馬酒老翁曲項奏胡琴近前爭博 君王

咲真見諸番愛戴心

張家口

北風獵獵上旌旃古堠連山峭偪天鎮將時平多扈蹕

六龍五載一巡邊

宣府早發

星羅城堡屹相望地是雄邊舊教場漸近關南秋尚暖
雁飛先過鷓兒梁

重陽下堡道中

垂楊全綠菊微黃九月關城未降霜踏盡烏桓千嶂雪
却來平地作重陽

入居庸關

截斷雲頭作翠屏官溝南瀉水泠泠黃花催熟旗亭酒
咲脫重裘度冷陁

居庸關名冷陁太行八陁之一也

彈琴峽

沙紋練練溜涓涓似有鳴琴出響泉松磴曉含三尺雪
石牀秋語七條烟聲希不信人間有悟徹原非拍上傳

莫聽鼓鼙思將帥清音今屬好山川

恩賜羔皮袍料恭紀

授衣時節恰歸期裘敝重叨 聖主慈飽食始知肥

美

臣素不食羊近奉旨賜嘗洵美味也

敵寒尤覺乳羔宜製成刀尺憐柔

毳

謝莊賜裘表靡毫柔毳

省對冰霜凜素絲行與都人還示儉三

英五絨在風詩

山莊雜咏 有序

山莊者我 皇上避暑行宮之統名也臣以草茅新
進再塵扈從自夏徂秋往返各閱百餘日其間山川
風土之美草木禽魚之狀一一俱蒙 恩指示凡耳
之所聞目之所覩口不勝述則紀以小詩合成三十

首用備遺忘不揣蕪詞並呈 御覽

朝涼夕爽絕氛靈畫裏山莊處處佳 聖德如堯惟尚

儉采椽不斷土為階古北口外行宮凡八所皆無丹雘之飾

章奏多從驛騎馳行宮勤政日孜孜三更樺燭明如晝

又是宵衣乙覽時唐太宗每以甲夜視事乙夜觀書

溪菽山穀味有餘 慈幃時達問安書往來中使頻相

望何異宮庭侍起居每得新蔬輒遣中使馳送 皇太后宮

阡陌橫從時藝區幽風七月繪成圖瓜瓠豆莢田家味

帶露朝朝進 御厨

烟光濃澹寫晴空多少旌旗掩映中大抵無峯無好樹

一峯不與一峯同

幾暇濡毫有万行臨池無體不飛翔蛟龍噴作巖頭雨

千澗流來墨瀋香

畫鹿宮門樹射棚冬膠秋幹試初呈靜中人籟皆天籟

朱鷺單傳中的聲

嶺複岡重不記名石缸隨處瀉琮琤濛濛薄霧沾衣潤

雲縷多從水面生

小雨初過月未升浮浮空翠暖如蒸不知濕氣消何處

萬竈炊烟万帳燈

林幽谷邃暗霏微過午人人換袂衣預卜明朝天色好

相風微動柘黃旗

松蓋年深雨露滋茯苓琥珀化應遲太平是物爭呈瑞

枯枿先看出紫芝赤芝產落葉松根

藥水清流比漆沮齊潭潑潑漾振蒲細鱗柘綠皆堪鱠

不數紅鰓巨口鱸細鱗魚重唇身有黑斑柘綠魚色微綠皆藥河所產

泡子河淤鳥鹵開霜華彌望白皚皚邊民聽食天然利

只禁鹽車入口來泡子河生天然鹽不待煎熬而成蒙古用小車載以貿易

煜煜蒼龍尾角蟠小星如沸鬧林端乍驚三尺飛光度

螢火大於金彈丸塞外流螢極大光可燭三尺許

泥金細縷簇龍鱗首尾中分翡翠紋頗訝賦形同蠍虎

試看噓氣却成雲山中蜥蜴長四寸許頭以下色如翡翠有紋如魚鱗尾作金色吐氣為雲

土人呼為雲虎

多年沙土養奇材照夜渾疑吐蚌胎可是水中真蘊火

但生涼燄不然灰山杏根入水千年光如水精夜置暗室中毫髮畢見

銳頭長尾口如靄肉翅旁連四足俱猜是千年老蝙蝠

問名方始識飛狐飛狐銳頭缺口耳小尾長毛深褐色翅如鼈裙四足生翅中前二爪後五爪能飛不踰尋丈

爪能飛不踰尋丈

叢間樸椒葉先枯歐李駢睛似火珠長路微甘供解渴

馬鞭爭挂紫珊瑚歐李一名烏喇奈子如櫻桃而大味微甘而醉

青楓烏柏自喬柯映日多成錦繡窩片片丹砂開障扇

就中椒葉得霜多椒樹葉大如團扇初生時可裹粉餅蒸食秋月經霜鮮紅可愛

山梨微澁杞漿酸崖蜜煎從翠釜頌珍重蓬萊金醴味

不傳方法向人間山梨枸杞汁經煉成膏味皆鮮美上嘗以賜近臣

榛實初生如栗蓬秋來采掇出低叢雞頭剝玉差相並

餽釘曾無一顆空俗云十榛九空塞外所產不爾也

難憑本草考豨苓異卉奇葩眼未經滿地根株移不得

金蓮垂實茵收釘地產金蓮花及猴頭蕨菇

官馬如雲盡上膘便經霜雪也肥饒地黃牧宿人人識

何似連山盡藥苗

千盤百折上興安寒燠平分咫尺間忽見萬松齊落葉

人言山後是陰山落葉松生興安嶺北秋冬凋落與凡木同

道是山鄉又水鄉四時多半領秋光西風欲起馳爭圖

早雪將飛麝退香

雲端千仞跨晴空真有飛梁亘彩虹番語漫傳生吉兎

佳名新賜玉玲瓏達陰嶺東北四十餘里山顛巨石百餘丈中通一門望若飛橋蒙古謂之

生吉兎 皇上 改名玲瓏山

晨隨羽衛愛山行夜宿周廬傍幔城自入秋來常起早

挈壺攢點最分明詞臣帳房在行宮南門外五十餘步欽天監司漏處也

畫屏環繞直廬傍草色常先柳色黃八月初頭風力緊

夜來傳 旨禁燒荒塞外草枯禁野火謂之燒荒犯者法甚重

蝗不成災歲有秋直從畿甸到邊頭更教州縣除蝻子

預計來年睿慮周秋來蝗不為災 皇上為明年慮命畿輔所在徧掘蝻子

溪流經雨雜清渾茗椀頻霑 雨露恩日給大官泉一

斛祇應飲水亦思源自發哈喇火屯恐河流渾濁致傷脚氣 賜臣等官厨水日一石

丙戌上元夜 召入西苑觀千葉蓮花燈恭紀

四首

太華晴光絢晚霞良宵移入 玉皇家月華滿苑清如
水湧出峯頭十丈花

天香飄下蕊珠宮映水俄驚太液紅不夜城中光四照
南薰先應五絃風

不羨金蓮畫詔回恍疑風引近蓬萊分明千佛光中現
併作紅雲一朵開

彩棚高傍 御樓懸千萼多從一帶聯不是大羅天上
見人間誰識火中蓮

潤木弟授庶吉士二首

初聞唱第向 丹墀再見班行雁序隨桂發五枝曾有

識余家廳事前有老桂癸酉八月開花忽作深紅色異於常時甲戌乙亥丙子丁丑皆然自是余兄弟及兒

子相繼登第

楊穿三葉可無詩

白樂天與弟行簡敏中先後及第故其詩云楊穿三葉盡

驚人家門我已推為長仕路君猶笑未遲何事相着兩相

泣雙親見背已多時

早緣貧賤多離別老去依依勝得朋小閣重添聽雨榻

短檠分點入朝燈浮踪到海翻相聚歸路如天豈易登

寄語阿頻存晚計且來共飲一條冰

時德尹在揚州書局

哭樊桐姪二首

丙戌五月初一

二十年前哭乃翁遺孤抱出尚孩童可堪留取昏花眼
看汝成人又送終

卑丁門戶剩嬰孩收拾殘書與寄回永訣有言吾不食

三千里外為誰來

敬業堂詩集卷三十二

敬業堂詩集卷三十三

海寧 查慎行 悔餘

甘雨集

起丙戌五月盡九月

入夏以來畿輔稍旱自五月二十一日 駕發西苑
大雨五晝夜田疇霑足萬口歡呼咸謂 聖天子軫
念民生甘霖應期不禱而自至視靈雨甫田諸什不
既多乎哉臣以珥筆隨豹車之後沐膏澤而咏豐年
固其職也

五月二十四日

駐蹕密雲連夕大雨

輦路涼生暑乍融到來連夜雨兼風四山雷轉車聲外
万帳燈浮水氣中入夢似聞泥滑滑占晴行見黍芄芄

頻年眊筆慙無補枕上吟成願歲豐

謝 賜普洱茶

洗盡炎州草木烟 製成貢茗味芳鮮
筠籠蠟紙封初啟 鳳餅龍團樣並圓
賜出儼分甌面月 淪時先試道旁
泉侍臣豈有相如渴 長是身依灑露邊

喀喇火屯口占

水無蚊蚋地無螭 寺有幡幢石有龕
山是膏腴溪是乳 草如桑葉馬如蠶

蔣酉君司年為余寫芙蓉折葦扇頭小景戲題

二絕

偶拈秃筆寫霜容 點綴誰知不取濃
會得江湖清氣味

蒹葭只合倚芙蓉

塞垣歸思入秋多 欲涉江湖奈晚何
一葦可杭吾亦去 詩翁莫嘆葉沉波

七月朔烏城立秋

行宮六月全無暑 早覺涼生大火中
客裏心情原草草 老來光景又匆匆
千山朔氣初迎雁 一雨秋聲盡入蟲
笑指伊蘇河畔柳 三年與爾共西風

七月十五日四更發熱河度嶺至喀喇火屯天

未明

塞天暑亦涼 矧此秋候變披衣起我早
熟路馬重踐群 峯競高低孤月滿
隱現參差樹交影 斷續雲流片長風

從西來過耳劇嚆箭行行得平地星火遙可辨嵐霧滃
然蒸橫前舖白練道旁有雙塔隔手不復見礪絕賴橋
通泉鳴知徑轉忽聽一聲鐘微茫識 行殿口外無佛
老之宮惟

烏城 行宮旁新
創穹覽寺琳霄觀

七月十六日烏城直廬驚聞房師虞山公訃音

哀情痛切托於短章四首

公去京華日余方扈從時癸未秋先生奉太夫人乞假
南還余時方隨 駕口外

三年歸失約一別見無期昨寄書猶達前月接家弟德
尹揚州信云端

陽前與先生同渡江初傳病尚疑何當聞訃後驚發早秋悲

涑水攜書局蓬山入選樓去春奉 旨於揚
州校刊全唐詩 奉親 恩

最渥給俸禮仍優在籍官 恩準開
俸從來無此例也 風格詩篇著儀容

畫像留

先生出都時留秋帆畫卷命題後
復奉手書命慎行按閱歷年詩集 到頭天莫問

公自有千秋

壯歲官

滄懷歸至性真科名無翹色

庚辰 殿試公
第一人及第

巖壑早收身穉子將周晬高堂正六旬懸知方易簣俯

仰劇傷神

歷憶追隨地多慙屬望情早曾同座主

癸酉鄉試慎行
與先生同出清

溪徐公廬陵
彭公之門

老及作門生寢哭知何日心喪痛失聲灤

河兼淚雨滴滴向南傾

題西君為家少詹姪畫四時花卉卷二首

乍驚五色江郎筆幻出黃筌四季花知是餘波多綺麗

未妨游戲亦名家

吹開吹謝自年年人世風災絕可憐一片丹青非色界
佛書有初禪二禪三禪四禪天至四禪天始無風災

座主總憲吳公請假旋里恭賦四律寄送

乞歸偏在 眷深時臺望非公更屬誰岳峙淵渟瞻氣
象蒼松白石表襟期久持綱紀群僚肅獨抱冰霜 聖
主知真喜太平多盛事大臣進退總逶迤

法曜文星並一垣高從河漢溯淵源回瀾力比鈞衡重

下士心忘副相尊秘閣有書皆博覽岩廊何事不深論

即看拜疏辭 朝後尚引肩輿到苑門
公前赴西苑辭歸上特命肩

輿至小東門慰問賜茶真異數也

詔恩暫許憇林間不比尋常賦遂初別路人皆期健飯

引年公未及懸車一門老去仍同爨八座歸來只舊廬

何物眼前當七發尊鄉亭外有鱸魚

一時祖帳盡名流才子同朝挽不留三殿文章行接武

五湖風月侍歸舟蒹葭隔岸雞催曙橘柚開園雁報秋

我是歐陽門下士柴車何日獲從游

題少詹姪寫經圖時在塞外直廬

我觀人世間知巧競一途乃至事所生虛名亦求沽不
見古孝子用心常近愚愚則本乎樸樸為誠所孚苟有
禪於親寧論事有無奉經祈冥福此語傳浮圖庶幾抱
微誠上荅父母劬通乎立教意可以輔吾儒宮詹吾宗
賢至性具髮膚少稟二人訓學優過庭趨出為鸞鳳鳴

歸作膝下雛中承贈君訃痛絕天難呼北堂垂白母爲
爾增歎吁甃勉進水漿傷哉反哺烏母氏繼下世兩喪
一時俱平生風木悲血泪交模糊君時年盛壯頓覺形
神臞霜寒宵寢磚味苦晝茹荼旁人競相勸勸保七尺
軀似聞西方經報恩古有諸親恩等山岳子報真錙銖
遂發寫經願寸心懷區區幃前一瓣香几上墨一盃竭
我兩眼力拚我十指瘡眼昏指如椎口誦足雙趺誦已
還慟哭哭罷復細書如此踰兩年白抽頭髮須當其迫
沈痛信筆非臨撫果然妙蓮華一一紙上敷一卷萬餘
字七卷七萬餘人天合掌敬燦若琳琅珠俞子亦好手
爲君寫成圖今來十五霜故山拱楸梧偶然展卷看清

泪猶承臚我生乃鮮民踪跡歎早孤先人尚淺土齒髮
日夜枯作詩志吾媿汗出成沾濡

八月十三日 駕幸翁牛特恭紀時八公主下

嫁於都倫郡王

一統車書域三朝雨露天名藩星拱極 法駕日臨邊
遐裔元家貴崇姻 聖代聯肅雖輿衛盛錫賚禮文全
事與和親異 恩加屬國專不煩湯沐邑特給水衡錢
甸服居相近華風被獨先丹青開殿宇錦繡裹山川封
爵原仍舊王庭遂不遷副車常侍 輦駙馬每從田負
弩鸞鑣下呼嵩豹仗前從看外孫國望幸自年年
木克帶西行十八里山下有湯泉

北行漸入苦寒鄉喜見湯泉湧道旁自覺溫能回黍谷
或云下必有砂牀波痕消盡冰霜氣石髓流爲草木香
便作解衣盤礴地暫時休澣也清涼

中秋夜柳林口翫月與王符先生及亮功紫滄
西君三同年小飲偶成十六韻

露白霜清候千巖万樹頭銀河斜繞塞金鏡迥懸秋輪
自東隅上光從西極流天長雄鼓角野靜散貔貅星火
移躔避關山倒景收賞應同北闕興不減南樓蕭爽
披襟得高空與目謀幾年叨扈從一夕抵旬休已免搗
衾直還爲秉燭遊王程千里共恩賜兩宮稠佳果充
梓按鮮禽入膳羞班荆傳酒令隔幔數更籌餅似團團

樣詩須醕酏訓老狂尤爛熳小坐獨遲留明日追成夢
吾生咲若浮起來林影下嵐翠濕衣裘

八月十九日 皇太子睿賜初白菴扁額恭紀

十六韻

地玃瞻 儲聖天高鑒積誠三光開 睿筆四海識菴

名夙昔棲禪志今來戀 闕情青雲垂欲上白髮正初

生有作皆邀 賞非才竊自驚蓬茅沾雨潤葵藿向陽

傾感激桑榆晚駢馳歲月更去家無累遣下直有僧迎

往往誇齊輩時時話 寵榮一瓢蟠木瘦松瘦三秀紫

芝莖匣許香楠貯賜帶數珠孟教淨水盛頗黎水盂白卮傳漢玉

綠硯琢洮瓊是物皆堪供以上六種皆兩宮前後賜物何年築始成

敬業堂詩集卷三十一
雖蒙頒扁額未敢計柴荆
蟻蝨微生賤龍蛇尺幅盈
方釣餘腕力恩重倍難擎

塞外大風二十四韵索同直諸公和

天上箕星動山中月暈生
土囊俄出口沙磧欲填平
猛拔群峰立喧招萬籟迎
奔衝來若鶩颯沓去如傾
牛馬渾難辨蛟龍怒欲爭
蓄威雷隱鱗助氣鼓砰鉤
劔戟齊攻壘波濤迫撼城
餓鴟當晝叫饑虎傍人行
鼠黠藏深穴蟲僵跼斷莖
草埋蛇鼻淺寒噤蜩毛撐
昨夜還防雪今朝竟得晴
駟雲成片段轉石落崢嶸
鴉起斜行亂雕盤遠勢成
向南惟雁路直上是鵬程
曠本難終日狂猶逞二更
將收偏作力忽散寂無聲
谷以虛能受心緣靜

不驚勿愁開橐籥祇是聽
竽笙袞袞除塵埃悠悠指
旆回頭千樹禿稱體一裘
輕酒近移床暖爐添宿火
明却看天宇曠翻覺塞垣
清落帽知何處飄蓬且自
征蘭臺多賦手小律倘同
賡

行經玲瓏山下

鑿開渾沌得玲瓏片石居然
絕塞雄地肺想從岩竇入
天台信有石梁通風雲噓
吸千尋表日月迴環一竅
中莫怪經過屢回望佳名
却與故山同

余鄉餘杭縣亦有玲瓏山

八月二十三日 上入山行圍射獲白鹿一頭

恭紀十韻

白鹿非凡種仙山歲月長
出當時有道瑞叶壽無疆

洞口眠時月原頭望處霜明明開射的皎皎入圍場碧
箸干鈞鏃瑤星一道芒最宜斨並獻肯與豹深藏至潔
斑同雪如膏色勝蒼皮能留素質草不療金劊雕俎充
庖味銀毫耀眼光謬慙陪羽獵作頌比麟祥

西君分餉黎藕賦謝十六韻

行厨滋味重肥膩饜牛羊正爾宜佳果俄看致滿筐遠
分慈母惠特並故人嘗藕抱玲瓏質黎含沆漉漿嫩疑
新出水紅似乍經霜洗剔親教淨摩娑愛倍常大瓢斟
雪汁小片截瓊肪鬆脆鳴牙頰芳鮮潤肺腸真堪解消
渴况乃佐清涼我本柴桑士居連苻藻塘踏泥風葉底
摘顆露籬旁賣菜多求益堆盤輒賤償幾曾虛野饋長
是及隣莊物理因希貴人情感舊長鑿池從憶白入谷
每思張二者今兼得何須問故鄉

道旁冢

其一在土城南岡上石獅二白碑一統
其一在土城東十里石几一石亭一上

刊孝敬之墓四字
姓名皆無可考

衰草茫茫近土城白碑相望兩荒塋當時馬革尸同裹
今日牛眠地總平野火漫容荆棘長塞田并乏子孫耕
有知合咲曹瞞拙欲刻征西占墓名

重過玲瓏嶺看霜林作十二韻

犖确重來路秋容最好時往年經雪早今歲得霜遲二
月花相似干林景特竒問名難辨種設色故多姿濃淡
丹黃葉交加爛熳枝簇來成綺繡踈處度旌旗換眼層

層別迴鞭步步隨已憐侵暮色還與發華滋粧點江南
畫鋪張塞外詩衰顏熏欲醉白髮巧相欺好事何人賞
登高此地宜丁寧朔風候旦晚莫狂吹

聞同年顧書宣前輩湖廣訃音愴懷今昔成五

十韻

絕塞來凶問初疑後果真恨難埋厚地狂欲問蒼旻憶
昔充鄉貢時同忝國賓紅箋通姓氏麗正約比隣名稍
居姜後癸酉同舉京兆書宣名在十八西溟十九余二十心常與顧親雁行聯
弱羽魚隊狎凡鱗雨雪連床數篇章擊節頻嗜痂良有
癖遭砭冬無嗔搜剔疵瑕出銷鎔鑛鐵純偷來輸格律
讀罷爽精神自爾投膠漆何曾計屈伸禮闈看再舉臚

唱聽移旬獨脫囊中穎先呈席上珍列科登一甲同榜

得三人金馬聲華盛芝蘭臭味均甲戌殿試書宣第一甲第二丁丑西溟一

甲第三庚辰余房師汪公自忘頻下第翻羨早抽身君

甲戌冬乞病喜鷗情適閒教鶴性馴落帆揚子夜踏月

廣陵春出處都如夢參商那記巡分攜從甲戌會合又

庚辰却話青雲舊俱添白髮新木樨參佛法黃葉證前

因黃葉打醒游子夢木樨參透老僧景已當搖落衰拚

向隱淪未成棲倦翼寧免作勞薪元老開黃閣微名達

紫宸壬午冬余因京江相國寸長嗟莫效六論咲空陳

釋褐推先輩含毫托後塵我仍留輦下君亦起漳濱

癸未冬書花底隨朝謁燈前惠討論詞源寬万頃筆陣

敵千鈞妙斲斤能運奇方手不龜與圖歸指掌道路識

迷津乙酉冬書宣奉 旨入直 南薰殿纂輯方輿路程乙覽皆稱善公才久

合掄使車方簡命省試且陶甄場屋收羅鄴門墻進郊

誥為爐分玉石握管稱金銀瑁璫徒喧詢從容視咲顰

不慙膺 特眷彌覺重詞臣紀進士榜 發後事遂啟扶風帳重

持大雅輪楚材傳自古儒術近尤振辭 闕還瞻戀之

官亦苦辛行期何苒苒別語太諄諄君于初春奉督學 湖廣之 命四月

中乃出都臨行時 頗以善病為慮北轍俄經夏時余扈從 避暑口外南轅似隔晨

鯉書猶待寄鵬賦忽遄臻江漢文星墜瀟湘士氣泯雖

云蒙 寵異寔未展經綸澤國秋多慘騷人例豈循歸

旌千里遠宦况一生貧憔悴孤踪在淒涼往跡湮老年

殊少泪痛極為沾巾

院長惠裘一襲賦謝十韻

推解情何厚炎涼序忽遷初過搖扇景已迫授衣天蒼

腋茸交密銀貂色最鮮製成微霰候拜賜朔風前輕暖

渾踰帛奇温又勝綿禿襟便跨馬短後稱垂鞭楊襲隨

時尚冰霜是夙緣曉披迴醉纈夜脫聳吟肩袖裏攜新

卷箱中感舊瓊敝裘從唱和回首十三年癸酉冬余作 敝裘詩先生

與西濱續君元 龍皆有和章

謝院長贈馬十二韻

廿載曾徒步三年會上雍借驢長自咲騎馬忽相從華

廐蒙分賜貧家慮乏供品應超脫兔種本出飛龍宋時 學士

例賜飛突過風前影難尋月下踪蹴冰蹄似鉄批竹耳
龍廐馬成鋒一色全凝雪三花待刷鬃密看毛細膩垂愛尾鬣
鬆王濟雖多癖孫陽詎易逢駟馳憐盛壯剪拂愧衰慵
捷徑休爭取歸途幸見容最宜隨下澤安穩代扶筇

半截塔次院長韻

龍沙茫茫荒怪集佛界剗天絕梯級誰與此塔此山中
高湧蓮華嵌空立大千起滅微塵過小劫須臾轉輪急
頑礪亂礫泐作堆風雨猶疑鬼神入當時委蛻兩夫婦
華表歸來改城邑相傳元時有某万户與其妻棄官學佛歿後合葬于此冰天下
壓巔頂平雪谷深埋半腰及我來訪古興桓地欲寫山
川入行笈每逢陳跡輒徘徊口業未停餘宿習草間定

有碑銘在野火燒殘沮洳濕國書難考竒渥温筆授惜
少鳩摩什公詩紀實良足徵歸去皇輿付編輯

院長惠家製金銀花露一餅賦謝二十韵

佳名傳本草舊識鷺鷥藤黃白移時變金銀任俗稱但
聞蕪葉曬寧寧解帶花蒸方法誰邊得園林手種曾栽培
無棄物筐筥亦時登籬密開從徧枝繁采勿勝製乘香
未散候視氣先騰倒挽河車水徐收并甃繩夜窗珠滴
瀝晨旭露鮮澄澹比初融雪清於乍釋冰恍疑仙掌露
直向玉盤凝出火經三日浮餅貯半升諒非供熱客間
或餉良朋邊地尤難致塵襟豈易膺流匙宜少許瀉盞
感多承點酒竒芬溢和茶別味增唇沾良已足肺潤更

相應沆瀣浴仙侶醍醐問老僧
薔薇紅莫擬玫瑰紫休
矜白戰聊成咏慙無故事徵

重陽日度木倫喀喇沁

亂山高下入圍場掠面西風似弩強
馬足聲乾千澗葉
雁群寒警一裘霜登臨豈必皆吾土
今古閒消幾夕陽
記取題糕重九節燎毛燔肉共分贍

是日撤圍賜贍一頭

雪後隨 駕度汗鐵木兒嶺

校獵秋初罷 回鑿雪乍零
雲峯晴晶晶風磴曉泠泠
換景供吟筆收圖入畫屏
万株枯樹頂獨愛一松青

重過唐山營

去日村村翠剡堆歸時碌碡廣場開
天教朔野西成早

又待君王射兔來

發波羅火屯至藍旗營

劍分一嶺隔西東

自駱駝嶺東北爲校獵之區其西南則山莊也

半月風光迥

不同沙磧人歸黃落後山家烟起翠微中
年豐障塞秋先獲水落浮橋路盡通
誰信古來甌脫地築場樊圃入
幽風

自星龕岩歸至烏城道中重見霜林西君有詩

再次前韵

過眼當搖落繁華又一時地非千里遠
候較兩旬遲
日晨猶麗烘霞暖更奇黃留將雪景紅
發未霜姿秀拔
多喬木輪菌之醜枝似燒原上火愛映酒邊旗
猶憶衝

炎去曾經緩轡隨綠陰晴借爽潤色雨添滋忽換登高
屐來題看葉詩含情如見待有信不吾欺榮悴天難主
妍媸分各宜本非松與栢那免受風吹

九月十四日烏城旅舍連接諸弟諸兒兩孫八
信口占一律

燈花如穗吐烟煤果有家書出塞來三處豈應同日發
八函却喜一時開勸餐兄弟憐年長到眼兒孫抵夢回
爲報老懷殊不惡地爐羶帳撥寒灰

重陽後十日入古北口

踏徧雲中雪外山敝裘重脫柳重攀寒花過節如迎客
朔雁先期已度關官馬散隨黃犢卧戍兵秋較老農閒

勞生屬有駢馳分默數三年六往還

石匣城南村民有駕牛墾田者 上駐蹕親履

田間扶犁行百餘步一時觀者万人咸謂

聖主重農勸穡至意真千古所未有臣身叨侍
從目覩盛事恭紀二十韵

雲捲三秋稻霜清百頃陂 君王除警蹕郊甸正鉉基

近接 鸞輿過群瞻 玉趾移羽林分仗立耕叟執鞭

隨龍見天垂象牛馴 帝解縻沾犁皆雨露被隴即京

坻久悉艱難意重蒙疾苦咨事傳千載盛 恩豈一夫

私自昔豐穰慶嘗聞史冊垂紺轅曾屢駕黛耜亦頻施

千畝周官籍三推月令儀大都修典禮已謂致恬熙幾

見勤民 主行當省歛時西疇躬自蹈田器手親持積
厚培尤力居高履愈卑九州胥樂土 萬乘是農師擊
壤歌相勸吹豳繪總宜人歡聲動地風遠播為詩作所
陳無逸釐成付有司小臣慙頌述振古孰如茲

俞扶九寓齋賞菊分韻得時字

關榆塞柳別經時一夕從君那得辭衝雪人過重九節
傲霜花剩半開枝寒香泛夜差宜酒病眼經秋漸怯詩
記取燈前論聚散明年相憶在東籬

時余將請
假南歸

題張研齋前輩桃花流水圖小照

時在西
苑直廬

北風夜狂轉冬律墜葉堦堦寒瑟瑟生綃忽展橫幅圖
暖氣春回映簾日垂楊夾岸水沒篙碧色染透胭脂毫

晴霞燒空半天赤點出万株深淺桃玉堂學士神仙客
每到花時懷舊陌鷺鷥翹足鷗刷翎下有鰕魚長一尺
船頭舉網船尾炊何如斫鱠留蓬池披圖空看畫中景
對鏡微添頰下髭我昨南帆經古皖棹入樅江春過半
至今清夢繞龍眠三十六峰紅不斷可憐此地不相逢
却在雲窗霧閣中青鷲綠簑何日辨且教閒處付漁翁

敬業堂詩集卷三十三

敬業堂詩集卷三十四

海寧 查慎行 悔餘

西阡集 起丙戌十月 盡十二月

凡詞臣請假葬親者例移吏部須六年俸滿方與彙
 題余自癸未入館甲申授職通計前後歷俸未滿四
 年丙戌秋杪隨 駕歸自口外於直廬冒昧陳情叨
 蒙 聖恩俯允所請誠異數也回思先母見背已三
 十五年先君棄養已二十九年矣長恐溘先朝露負
 土無期今乃得買地西阡歸營大事吾子若孫履斯
 阡也當念貧家葬親之不易益感 聖朝卹下之深
 仁則茲集所留特涕泗之痕而已

恩賜白金二百兩恭紀十韵

竊祿清華地霑 恩湛露天朱提頒少府白鏹逮微員

優倍二年俸榮踰萬選錢既非金穴比 旨自玉堂宣

重馬歸時載空囊補處穿春衣還質庫客座設青氍暴

富隣翁問長貧費婢憐每持清白誠 望子孫賢不敢

辜 君惠行將置墓田孤生餘頂踵感涕為光先時先人尚

未營葬將以賜金買地

乞假葬親南歸 睿賜騾馬二匹恭紀二十韵

連騎 東朝出輝煌照路岐來從蒺藜苑產自渥洼池

騾馬名雖別龍麟種並孳漆光明似鑑騾色純黑紫燄潤無

疵馬色純紫抖擻塵沙淨開張骨骼竒八蹄行互舉雙尾立

交垂共飲無踈齟同槽免繫維曹韓師盡理湛岳比妍

姿東坡詩馬中甚岳有妍姿天廡方登用房星忽下移聯翩驚異數

蕃錫荷 恩私臣本駑駘質生逢 特達知昨來衣白

袷今去鞚青絲屬有駟馳分真當愛惜騎芻艾慙厚給

鞭策敢輕施每憶重經處寧忘徒步時雪深東郭履寒

勒灞橋詩歸徑逡巡識旁人指點疑力衰輸盛壯心在

冀追隨數齒殊多感齊衡轉自嗤長鳴同戀 主臨發

又遲遲

將出都留別院長及同直諸公四首

有生長恐負 君親白首清班忝後塵蘭畹草生聊自

託鳳池鷗入亦相馴關門柳色三經夏苑路花光四及

春總是 恩波最寬處就中容得濫竿人

窀穸先人久未營隨身挈涕每縱橫微官敢作歸田計

聖主能憐負土情篋有 賜書裝不薄囊惟襍被累差

輕只慙驚鈍宜長放尚與驕騶逐隊行去年九月 皇

年十月 皇太子賜驛馬二疋院長亦曾惠馬故及之

勿論解組與彈冠直為 天高仰報難情重繞朝新贈

策夢深星瀨舊投竿 九重禁闥深嚴地七品年勞本

分官尚許衡茅專一壑猶能曝背話 金鑾

得歸未掃舊巢痕用東坡詩中意 去住心孤但自捫列宿回瞻

天北極單車獨赴國西門檀溪屋老將誰主粟里田蕪

尚有村長羨真鴻在寥廓不曾輕受稻梁恩

與潤木別於彰儀門外

自我住京師五年裘換紵名成時已晚 恩重歸敢遽

子臣虞兩負方寸亂徐庶請急太匆匆痛深創寔鉅親

亡未克葬貧到傷心處追憶初喪時悲端非一緒汝時

尚角州至性本天具今來強仕踰將伯寔堪助同歸苦

未得時弟亦欲乞假而未遂 万事料難預送我出修門殷殷戒徒

御我行營大事家督難自恕饑凍固其常兒孫何足慮

來騎蹇驢來去駕柴車去風吹日杲杲飄散蘆花絮灑

淚各無言哀歌聊自叙

晚抵良鄉

近畿積雨後大道成塗泥舊時攔馬墻今作蓄水堤眼

敬業堂詩集卷三十四
三
中有岐徑涉足恒恐迷正賴孤塔高前行辨東西南來
者誰子賓從相排擠光輝溢路旁簇簇千輪蹄倉卒爲
引避我車若雞栖

早過涿州

曙色朦朧十里橋城端雙塔聳峒堯層冰欲裂風何橫
濃日如熏霧忽消新闢河淤半蕪沒舊攀沙柳尚蕭條
出畿便是田園路南望三千未覺遙

五更發高碑店

久作京華客鄉程夢易迷分明茅店月猶誤早朝雞

食安肅菜

老夫居貧曾種菜露韭霜菘成替代竭來竊食大官厨

百甕黃虀剩餘債歸程晚經安肅縣一碧環城雪初蓋
流涎大似逢麩車願朶腸鳴難久待頃筐雖乏園官送
求益何妨擔夫賣銀刀削葉土銚烹柔滑清甘美無對
花猪肥豎真堪唾野飯村沽差足配家童相顧旁愕眙
不信主人心篤愛我願當官知此味腴剝毋爲里閭害
又願民間無此色春社祈年秋報賽菜畦不蠖田不蝗
過客盤餐聊一快

渡三义河沙滋唐三水合流於此

百里平陂際白沙滋唐兩派滙三义樹頭小扇風旗影
舊識中羊村名賣酒家

重入束鹿境宿清官店先寄兒建十二韵

上谷南來少戍墩

自張墩以南道旁無埃

天寒日薄易黃昏重穿

野水平沙路又宿柴門老樹村地遠郊圻殊僻左人隨

歲月劇驚奔遠迎何敢煩丞尉

黃丞趙尉至此相迎

再到惟欣長

子孫顧我便能偕隱否問渠可有去思存

時兒建循例量移將離任

矣一家飽暖踰初望百里絃歌盡

國恩捧檄當時聊

自慰折腰今日且休論仰邀天幸年頻稔下賴民淳訟

少冤成就汝為無過吏保全家是舊清門雖無餘力營

三徑已忝廉名達

九閨酒盞久拋思共把燈花何喜

遽能繁明朝飲馬滹沱側好對清流驗鬢痕

乙亥秋與許霜巖同過深州忽忽十二年矣重

經此地題壁依然時許遠宦滇南口占寄之

飛鴻一散天南北拍爪痕從壞壁留惆悵城南獨吟客

夕陽隨影過深州

饒陽道中作

我前冬日暖我後北風狂向背苟異宜一身判陰陽矧

乃別形體疾痛焉能詳造物豈不仁饑寒盈道傷目存

力匪逮惻惻中自傷

曉發河間黃昏抵大城縣

瀛海東來路漫漫百里長田荒薪比桂潦退鱸如霜牛

跡迷朝霧鴉聲散夕陽誰憐畿內地經眼有蒼涼

奉謁座主少宗伯許公於大城官署敬呈二律

一城斗大控河壩析木遙從天漢連永賴渠成傳万世

暫勞公出已三年時子牙河堤告成報績不遠矣棠陰樹樹堤邊柳膏

澤村村對上田漳滏漳沱皆底績不曾輕費水衡錢

秩宗兼職領司空畿輔行看奏禹功憶送瓊車衝朔雪

重來冰署坐春風何人愛士同迂叟從此歸田望醉翁

準備籃輿候三徑先傳鄉信到江東

曲路店遇吳元朗

去國非初約相逢泪一揮余因營葬出君亦帶星歸時元

朗丁衰柳催蓬鬢枯風裂布衣半生知己分到此倍依

依

大風抵張夏戲題旅壁

四幅帷裳巧障風到來村巷聚兒童此中閉置疑新婦

一咲那知是老翁

崗山栢

戢戢排行欲及千黃楊小厄故依然廿年野火荒山道

看爾幾成劫後仙

長清山行

曉露趁殘更荒雞失次鳴嚴霜升井氣落木走風聲礧

道衝沙聚山牆疊石成大都生瘿俗磊塊總難平

泰安州題壁

少負狂名老好奇逢山興發尚淋漓如何十度城南宿

不敢輕題望岱詩

長至日山左道中即目書懷二十四韵

一線添歸日初陽放曉晴細泉水底咽枯草燒餘萌土
瘠逢人問年衰換節驚滿前憐凍餒即事歎淒清此地
初荒旱相傳半死生 至尊憂獨切當事責差輕足陌
千緡給留漕万數盈不教移積粟專欲活殘甿碩鼠成
羣聚哀鴻四散鳴民貧寧樂禍官賑特空名受爵能無
愧增階竟冒榮牛羊難問種雞犬乍聞聲正使流亡復
懸知疾苦併如何經儉歲尚爾廢深耕聖飾郵亭麗修
治平道路平戍旗雙隻堠墟落短長程僅免追呼擾幾
同力役征辛勤偕婦女率作及兒嬰望幸心雖結安巢
計未成 皇仁終見憫吏治亟宜更自咲犁鋤叟來隨
商旅行何曾受芻牧直是惜娶悍暖律回鄉夢寒灰付

宦情所祈年穀熟終老卧柴荆

羊太傅故里

班書源可考系出泰山羊世已經千載魂應戀故鄉功
名論際會氏族閱興亡峴首沈碑後何須感歎長

新泰城南望熬山

孤峯截斷連山脈大似人間獨立人地湧雲根浮縹緲
一名青雲山天生石骨瘦嶙峋仰瞻泰岱旁無附平揖徂徠
近作隣不用多生閒草木免教榮落改冬春

旅店食雉兔作

頻歲叨陪獵秋田雉兔肥中官馳馬 賜侍從掛鞍歸
北上何年再南京此味稀經過慙野饋寂寞慰朝饑

蒙陰城東十餘里地名城子莊壬午初秋曾一
飯於此水旱之餘居民百餘家轉徙殆盡惟舊
時逆旅主人在耳感歎不已紀之以詩

敗茅頽壁兩三間白室漂流偶一還記得往年題句在
豆花棚下看蒙山

抱犢詞

桃墟道中見一老叟抱
黃犢騎驢而行戲作

東村牛旣秋不熟別向村西買黃犢買成抱上蹇驢騎
驢尾稀如翁髯禿驢今馱翁復馱畜步步施鞭毋乃酷
人情厚薄從古然或加諸膝或墜淵

古明鏡詞

見道旁醜
婦而作

人間有真色嬌者顏如蓮東家欲效之紅白調朱鉛衆

方賞塗抹羣謂醜者妍好女不自明詎藉旁人憐妍媸
果若從人定何用團圞鑄明鏡

沂州出山

沙淺沙深窅復均一行疎樹帶烟郊山經齊魯青纔了
馬渡洗沂碧未膠小圃重樊因枳棋浮橋粗就賴蘆茭
經旬尚滯黃河北漸喜魚羹入客庖

淮北聞雁

風急霜清欲渡淮數聲客夢鷓鴣回與誰好作江湖伴

東坡詩我衰寄江
湖老伴雜鷓鴣

憐汝亦從邊塞來殘月曉催千片落

長天寒曳一繩開蓮房菰米沈波後集澤群多亦可哀

夏秋之交淮
南北皆被水

從宿遷登舟連夜渡河

勞筋貪暫息買棹聽漁歌漸與江淮近自然鴻雁多涸沙無斷岸急浪有盤渦忽報晨冰合吾舟已渡河

黃河中流見月出口占一絕

誰謂河流濁吾疑徹底清一眉殘月影鏡裏看初生

發清江浦二首

南來步步遠風霾川路晨征一倍佳竹筴蒲帆渾不用櫓聲如雁下長淮

編蘆縛荻聚成堆大舸多從江外來試問老堤堤畔柳年年辛苦爲誰栽

重晤大司農徐浩軒先生於淮上二首

邊風朔雪灑重裘猶記鋒車一夕留却到淮陽冬候暖

滿窗紅日話中秋

中秋前先生復于柳林口行帳中

命至塞外盤桓半日

河堤本是司空職計相重乘使者軺館閣人情久延佇

江湖粗了合還朝

先生以大司農兼翰林掌院教習庶常似不應久于外故云

張運青先生見餉食物遣人遠致于四十里外

以詩奉謝

見說官廚儉淮流孰與清於公無媿色餉我見真情追送煩郵使分嘗徧老兵道旁傳異事此客勿相輕

寶應雨泊

冒雨衝泥取次行多年不聽滴蓬聲此聲好是治聾藥老耳孤燈分外清

曉晴發寶應喜得順風先寄德尹揚州

安宜城外雨餘天晨旭初生血樣鮮湖似貫珠行不盡

秦少游詩高郵西北多巨湖累累相連如貫珠雲隨飛鳥勢爭先離心各抱三

年外短夢難禁兩日前一事報渠差快意好風添送順

流船

掛帆行六十里將抵界首風勢轉狂小舟不敢

下閘戲成二絕

閘口狂風撼柁樓隄邊驚浪聚浮漚何妨暫作須臾住

只笑荒灣遇石尤

石尤風緊人知避我獨逡巡避順風不謂有風行不得

掛帆何必急流中

高郵道中

北風吹折荒灘蘆四無頃畝純浸湖周遭三十六陂水

中置一城形覆盂蔣之奇詩中間可以置城頭角聲曉

如訴城外人家半漁戶我來正及積潦收但見飛鳧導

前路買魚射鴨值幾錢所愁米貴厨無烟水鄉作客大

不易嗟爾居民誠可憐

大雪夜泊瓜洲二首

茱萸灣北晨沽酒瓜字洲南夜泊船我自只如常日醉

人言風雪滿江天

歸途未免防冰雪一月晴和竟似春今日漁簑堪入畫

天公原不薄歸人

雪後渡揚子江

廿里風程一霎間
海門晴色帶潮還
白頭浪裏參差影
看盡江南雪後山

舟過丹陽有感於范堯夫事漫成一律

郵籤朝過曲阿城
又是江東第二程
一刺投名羞俗態
十年爲客見人情
當時已少郭元振
故友誰如石曼卿
預遣家書刻歸日
兒童不用遠相迎

是日遣老僕先歸

三十年來舟過無錫
未嘗再游惠山口
占解嘲來往如梭
三十年不曾重酌
德池泉他時終作
法雲老償取平生
未了緣

膠山在無錫縣東四十里
九域志云山南有梁

蕭侍郎故宅今無可考矣

蕭蕭雁鶩鳴枯蒲
南朝侍郎宅有無
膠山漸近惠山遠
中隔芙蓉一片湖

渡尚父湖晚抵虞山二首

烟村雨浦遞灣環
忽入澄湖杳藹間
常愛大癡橫幅好
不知粉本在虞山

長松高下蔭坡陀
老柳參差蘸碧波
咫尺吳門風景別
山塘十里稻堆多

過錢王友河亭話舊二首時已收身奉佛但未廢飲耳

團蒲旁着一龕燈
韁鎖中無杜伯升

事見東坡詩

長恐入門

遭痛棒對君吾是啞羊僧

不愛天花作道場
方緣消盡酒難忘
白樂天有何從今處難忘酒詩

方丈維摩室添辦清香祀杜康

與許暘谷時許初自山右歸

一咲還家未覺貧
奉承堂上白頭親
可憐我亦稱人子

負米歸來晚為身
少陵詩負米晚為身每食臉必泣

西阡雜感五首

銜恤三十年今方卜城域
有身彌自痛負土假人力

其二

兩山如玦抱一水
縈紆注落葉滿西阡
別家墳上樹

其三

坡陁非丈五馬鬣是新封
小著樊籬護須防鹿觸松

其四

墓田故無多又占數間屋
庶望子孫賢既耕且還讀

其五

一門四兄弟去住難自主
丙舍幸已成神傷對牀雨
時潤

木乞假未得

除夕與德尹信菴守歲二首

駮雞芻酒餞殘年
餽歲鄉風自昔傳
不為盤餐營口腹

老來情味合歸田

家貧未免思游宦
及至成名累有官
畢竟商量何計穩

白頭兄弟一堂難

迎鑾集

起丁亥正月盡一年

丙戌偪臘抵家營先人塋事畢將於西阡築舍爲
休息計會 天子閱河南巡在籍臣僚例應遠迎
明年正月買舟渡河隨 鑾自淮陽抵江寧至蘇
杭五月初於高郵送 駕再展六月之假乃復歸
里通計一年中息肩不過二百日懶不作詩僅得
如干首

園梅垂放而主人將出門口占一絕

冰雪禁繁蕙莓苔裹老枝吾閒猶未得不謂爾開遲

錢玉友有見寄長篇極論作詩之旨終以傳世
相期許兼承不朽之託連日阻風虎丘舟中無

事賦此奉訓

吾觀工畫人胸本蘊丘壑雲烟資變幻山水赴脈絡又
聞國手碁惜子不輕落翻新布奇勢全局如一著良醫
去成見因病施方藥巧匠先量材運斤乃盤礴羿射無
詭遇騶琴有驪攫高僧厭苦空入棒解拘縛老仙出狡
僧九鎖故橐籥惟詩亦云然衆美視斟酌神功須力到
佳境豈意度人皆信手成熟肯苦心作同心得錢子洞
見非隔膜惜哉方逃禪此道付糟粕偶然一吐露萬象
互疇酢足知精進幢隨事無退却投篇過推許不量余
所作平生知己分夙昔慎唯諾寧待遲暮年重爲不朽
託君其益自愛藏藁手親削

玉友近編所作詩
九卷名撫雲集

夜泊京口

誰信勞生有路難山川猶作故鄉看風翻石壁連城動
潮滿江船出口寬細火一星疑遠市重裘二月尚春寒
東君不管梅花信任向高樓笛裏殘

奉和座主相國澤州公吳橋道中見寄之作敬

次原韻

時扈
蹕南巡

浮浮薊北烟曖曖江南樹聞公陪輦出延佇几幾度早
梅已飄香繁杏亦修嫿惟占燕雀喜詎觸蛟蜃怒挂席
下清淮馳情快前遇詩高有孤唱興愜無長路絮暖菜
黃灣風輕桃葉渡舊遊吟未足更向湖山去

院長揆公出都時亦有詩見寄清江舟中出以

索和奉次原韻並簡唐東江考功

清音天半落松杉吟傍仙舟響亦凡夜雨一篙平岼水
春蒲十幅渡河帆不辭醉咏花歌帽預擬題襟墨漬衫
爲報東江老居士速馳詩遞荅來函

揚州城外觀燈船和友人韻二首

琉璃一片映珊瑚上有青天下有湖岼岸樓臺開畫錦
船舩絃索曳歌珠二分明月收光避千隊驪龍逐仗趨
不爲水嬉誇盛事萬人連夕樂堯衢

錦纜朱欄綵鷁群滿川春暖氣如熏倒窺銀海千枝燄
迸散金波五色雲雁齒初裝虹有暈魚鱗不動水無紋
君王到處皆勤政猶自宵衣坐夜分

題湘雨禪師宙亭詩集後師乞余作序故落句
及之

九僧歿後名僧少今見詩中第十人傾倒盃囊千斛水
洗空衣裓七條塵秋田領鶴精神爽春谷聞蘭臭味親
不敢與師多作序欲離文字證前因

初登金山

齋鐘浴鼓平生夢垂老方成扈蹕遊忽聽潮聲分兩派
信知樹影在中流千櫂雲霧浮孤墪三島樓臺聚一漚
終脫朝衫穿野衲卓菴閒地幸相留

清明喜霽再登金山同院長作

片颿重過潤州城曙色東來海氣晴千點桃花一江水

妙高峰下作清明

雨後隨 駕發龍潭抵江寧

晨隨羽衛發龍潭雨氣初收日色暹驛路馬嘶泥滑滑
野田雉雉麥漸漸六朝烟柳攀曾岍三月風花賣酒帘
擊壤吹豳聲一槩尚煩 停蹕問茆檐

隨 駕謁明太祖孝陵恭紀十二韻

明祖山林在 天家祀典昭千官隨虎旅 萬乘駐鸞
鑣風雨東來近江關北睇遙石城蟠脈厚靈谷蓄泉饒
狐兔何曾窟松楸竟不凋運雖經鼎革 詔特禁芻蕘
下馬坊猶聳稜恩殿忍燒遺民安率土 聖主念前朝
本以仁除暴還同舜紹堯統傳心有契社廢廟無祧陵

戶煩增置神宮儼舊寮
霸圖界六代園寢任蕭條

院長見贈大篇過蒙推獎次韵奉酬

騷雅本正聲沿流乃盡變
前賢不苟作寸錦勝匹練
自從篇什繁觀者目易眩
公才擬日星有作万人見
圭璋既特達氣類必引薦
賞奇神有交嗜善誨不倦
手持大圓鏡盡攝諸方彥
高談折深源小智窮曼倩
伊余好吟咏宿昔弄柔翰
駘百舍趨追驥不及半人
言桃李春自顧桑榆晏雄
辭荷獎借照眼驚璀璨
穆穆被清風嘒嘒發將旦
和章如草木披拂聊供觀

自葑門至崑山舟中作

鯉魚橋外綵旗斜
乙未亭邊鼓笛譁
六十四涇烟水色

半隨 鳳舸泛桃花

鯉魚橋乙未亭皆在葑門外見丘與權築塘記六十四涇詳吳郡志

立夏日吳山寓樓偕竹垞朱先生及鄭息廬馬
衍齋素村家德尹為櫻筍之會竹垞有詩和荅

一首

夏木陰中夏日長
小樓西面吸湖光
簾櫳昨夜猶春雨
花事今年偶故鄉
佳節重逢知幾度
白頭一笑抵千場
朱櫻紫筍家園味
容易山廚得飽嘗

雨中隨 駕泛舟西湖次院長韵五首

看山曾向雨絲中
青苧竿頭弱柳風
今日船從天上坐
亭臺不與昔年同

沿隄畫槩愛徐行但換橋坊不改名水墨圖中天一色
鷺鷥幾點去分明

澄波何處著纖埃寺面多從鏡裏開放鶴亭邊聊一憇
居僧猶記探梅來

搖曳垂楊淺水灣心隨魚鳥欲忘還裏湖行盡外湖出
又露西南兩角山

老去論詩敢自豪從公遊興尚陶陶袖中攜得西湖去
十幅吟箋勝薛濤

昭慶僧樓同年佟淵若學士步月見訪

滿川烟火氣熏蒸誰解敲門問老僧多謝同年能見訪

上樓初點佛前燈

是夕湖舫烟火最盛

和淵若學士西湖雜咏四首

短牆高閣俯層瀾中有幽人洗眼看漫道放船隨處好

烟波終讓外湖寬

時淵若寓段橋外

雙鳩啼雨又連朝濕翠濛濛隔岬遙好片蘇公隄畔柳
暎人騎馬渡虹橋

賀監狂名老在無酒船一榼未應孤心知不及聞鷗鷺
拂雨翹烟占此湖

四圍圖畫本天成三面雲山一面城多少才人吟不盡
尚留佳句待先生

雨中過南湖訪老友盛鶴江二首

幾梢新竹透籬根一片蒼苔印屐痕六七年來聞不出

感君爲我特開門

烟雨迷離又一春舊遊如夢亦如塵萬緣消盡詩名在
猶替南湖作主人

隨 駕重至虎丘寓直仰蘇樓下

好片生公石重來似十洲爲逢僧話舊猶認仰蘇樓

聞兒建到家之信

爲貧而仕全家出末路何堪久別離書卷拋來鮑魚蠹
田園荒後長榛茨急流自信差能退廉吏誰云不可爲
比似遷官還校喜燈花爲汝報歸期

吳門舟次喜遇潤木假歸

誰傳遠信自京華聞汝歸程漸有涯驟見尚疑俱作客

昨歸翻怪不同車半年冰雪愁爲減一飯江湖勸互加
錯料老夫詩是識白頭兄弟盡還家

予去年除夕詩有白頭兄弟一堂難

之句故云

重酌惠山泉

千章老樹蔭溇泓不忝茶經第二名急借匏尊蠲久渴
旋敲石火試新烹僧無吝色從多汲客有餘甘爲一清
挈得餅罌須穩載免教地主累張衡

奉謁侍讀秦公於寄暢園敬呈五章

石龍噴沫轉堦除平碧中涵萬綠俱信是有源能不竭
芴分一派給僧厨

合抱凌雲勢不孤名材得並豫章無平安上報 天顏

喜此樹江南只一株

園中樟樹一本乃數百年物上嘗傳問此樹無恙故云

山光水色盡沾

恩風月兼留雨露痕

堂中有山光水色松風水月諸

額皆十餘年來筆屢次題賜者

御頭白村翁傳盛事

鑿輿六度幸

名園

德門子弟媿荀陳再見瓊枝玉樹新

謂洛生喬梓

却笑平泉

空作記世家難得是文人

韓公文體杜詩名謝傅家聲白宦情四海只今無執友

從遊應許老門生

辛酉先生典試江西廬陵彭公是科所得士慎行癸酉舉京兆又出彭公

門下例得稱門生

麥秋

桑疇宜暖麥宜寒 宵旰憂勤亦少寬親見江淮民樂

業清和天氣好

回鑿

邵伯埭送

駕後歸舟即事二首

埭南埭北鯊魚肥斗野亭邊興不違說與故人應惜別

千帆送盡一帆歸

高寶中央地最低秧針浮水水浮畦露沙雨足牛蹄健

萬頃湖田盡架犁

與德尹自揚州連舫渡江

梅花開後草堂前準擬春來共醉眠此福兩人消不得

半年五上渡江船

入夏苦旱六月十五早偕鄉人禱雨烏龍井步

至菩提山真如寺二首

淡月朦朧般若臺沈沈海岸蔽黃埃可憐我本無田者
足甕荒山乞雨來

臯蘇遺廟在巖阿

潛說友臨安志云鹽官縣東七十里
有烏龍井廣四尺深七尺冬夏不竭

相傳臯蘇二將軍

逐黃巢死於此因祠焉紹興十年歲早禱雨即應勅賜濟福廟額在寺南六里

古井

年深不起波好笑兩三垂白叟便思泥首致滄沓

耳聾

五官初廢一萬竅為收聲絲竹吾何與雷霆衆自驚少
聞差省事多笑豈無情社酒如堪治明年試聽鶯

十月十七日病起過鄰僧融然房看菊

閒僧仍種菊病叟偶還鄉物色憐寒蝶人情愛晚香開
遲經夏早節爽似秋涼對此增惘悵吾家徑久荒

周濂溪先生家塾銅章一枚形製竒古其裔孫

歷世寶藏來索題句敬賦一章

道州崑起千年下聖學昭如揭日星遂使大儒承統系
猶留小器觀儀刑摩挲繆篆蟲魚古洗剔銅花翡翠青
不比還珠空寶積子孫長得護精靈

天寧詩僧文緯見過

夕陽影裏鴉投樹落葉聲中犬吠船久矣蓬門無剝啄
偶然葦岸有緣沿孤吟喜接金襴友一味能參玉版禪
時以冬筍見餉絕勝地爐煨芋在為師飽喫送殘年

敬業堂詩集卷三十四

敬業堂詩集卷三十五

海寧 查慎行 悔餘

還朝集

起戊子正月盡五月

家居一_上展限已滿州縣敦迫就道勢難逡巡一術士
語余曰君欲賦遂初其在壬癸之交乎余笑而領
之既至都仍內直昔楊誠齋自江西名還陸務觀
有相賀歸館之作今集中所載朝天續集此其時
也後五年從江東賦歸果若術士言則余之退休
亦不遠矣

立春後五日清溪舟中大雪留別談未菴徐任
可十二韻

四野雲俄合孤舟凍始消東風鳴昨夜大雪灑今朝
迨成竒特斯須破寂寥連峯胥挺玉衆水畢趨苔委浪
疑鋪練投村誤斷橋微嫌經臘少偏愛入春饒亞白回
梅眼誇輕鬪柳腰近人何脈脈隨我太飄飄吟對知才
減寒禁待酒澆畫圖愁去國蹤跡咲還朝時余將莫北上
便欺蘭蕙終須別艾蕭溪山有迷路長恐失漁樵
聞少詹姪京邸訃音時余方東北裝先馳詩四
章哭之

忽馳家信入新春凶問初傳或未真共訝緘封纔偏臘
不知屬纊已經旬兩宮遣問無虛日一姓哀榮得幾
人屈指輻車定南下空將老泪灑征塵

早年同學晚同官永訣俄從小別拚去年四月抄與
有餘哀何日盡死無留憾古來難層霄路近瞻聲山別於揚州雙闕
淺土年深痛兩棺臯復有靈知不瞑側身天地荷

恩寬

家門先後忝科名臚唱同聽第四聲遲汝八年稱後輩

丁丑春聲山從庶常授編修余授職在甲申冬月相距八年長余一月禮先兄余兩

庚寅生而聲山長余一月前奏帖及班次余皆在後故云籍咸入社名相亞廣受

還鄉夢隔生從此孤踪蕙善病菟裘知復幾時營

推挽無端到不才王程何處不追陪每當宣喚慙臣

老嘗蒙東宮名對以特被恩頒恤爾衰丙戌十月

直命慎行賞賜七發同朝皆屬望三年一病竟摧頽

可憐烹鯉沈綿候猶寄音書促我來

過梅里爲竹垞先生留一日

鄭重還山約餘年準擬同如何向岐路又復轉孤蓬過
酒衝筵雪維舟拍岸風我衰公早白告別敢忽忽

虎丘花信樓與馬素村別

樓頭樹色已葱葱樓外烟光薄未融客況前遊前度夢
去年二月泊舟樓下五日乃渡江春程一雨一番風綠蕪望極空濛際
白髮痕深聚散中多感故人臨別意揮絃遙送倦飛鴻

丹陽即日

連檣芴有小車行不斷伊鴉軋軋聲夾岸坡陀帶殘雪
麥苗青上曲阿城

重過高旻寺留別湘雨長老

茱萸灣口記停船再叩禪扉已隔年四海僧皈康寶月
三生人說杜樊川閒投拄杖殘雲外倦倚征帆落照前
等是有山歸未得憐師還復望師憐

雪後晚抵儀真

白沙一道走平川野有耕犁步有船方頃瓊田鋪宿麥
幾村茅屋起蒼烟新泥滑路逢初霽枯樹攀條感昔年
曾是阻風中酒地老來情緒倍依然

乙亥秋從六合發舟阻風于此

江浦農家

江邑連年旱爲農詎免饑牛羊誰是牧雀鼠自能肥野
廢林廬在城蕪戶口稀眼看春社近倘與燕同歸

滁州看山

霧薄疎林晴曖曖雪消幽澗響潺潺曉來衝霧踏殘雪
愛看環滁面面山

欲遊瑯邪山尋醉翁亭不果

征輪兀兀鬢催斑誰遣勞薪不暫閒咫尺西亭行不到

又隨春雁度關山

土人呼清流關爲關山

清流關

一綫飛流百丈清洩雲歎雨落崢嶸時平久罷中原戍
地險猶沿五代名琴筑低昂因石勢風濤起滅付松聲
瓦銚茶熟行人渴只有閒僧管送迎

磨盤山

勿論九折與千盤涉足誰如此路寬羊角旋風隨曲曲
磨牛陳跡轉團團連雲取棧紆終到峻坂迴車下最難
不是人間無捷徑漸鴻原自喜盤桓

池河驛

古驛千家聚鍾離北望孤河流近淮泗山脈盡荆塗客
餘論珠貴村醪計盞沽明朝貪早發前路入平蕪

臨淮縣渡河

暴漲衝橋斷孤城比石堅中流聲沸地別浦氣沈烟渴
虎憎關吏饑烏仰客船渡淮魚米賤隣壤接豐年

淮北道中

隔岸草穢穢人家綠映檐泥中逢驛騎樹杪展風帆暮

色遙天落春寒細雨攬故鄉行漸遠猶未換春衫
冒雨發皇莊入靈壁境泥淖甚深兢兢有失足
之慮車中口占

泥濘忽如許行行險且紆平生無闊步老去復長途不
少前車鑒誰為將伯呼短筇吾賴汝緩急幸攜扶

宿州村家有種栢作籬者戲嘲之

數椽曲木架茅茨雨打風翻大半欹多少荆榛寬束縛
屈將翠栢作樊籬

春寒

杏葢稀疎菖葉短田家占候幾回過春光只似宦情冷
自渡江來風雨多

旅店食紅蓮米飯

見說太丘產紅蓮稻最良色疑新出水粒愛乍除芒少陵

詩除芒子粒紅浙罷鮮于染炊來軟更薌曾蒙 天上賜往年隨

駕口外官一飯愧私嘗廚曾賜食

永城縣署與唐殿宣飲別

共作風塵吏聊追夙昔歡分攜頻改歲相勸一加餐酒

綠禁愁淺燈紅欲別難老深兒女戀直似故鄉看君之長子

余姪婚也余姪又為君婿時皆在座

道旁官柳一樹獨枯

同根連理枝一樣被風吹莫問榮枯意春工兩不知

商丘道上戲作蕪寄同年宋山言二首

少治春秋老漸疑宋都舊事記依稀近來六鷁多爭進
幾見因風稍退飛

梁園春半好風光紅杏開隣宋玉墻苦被時名牽率去
一官頭白按書忙

寧陵喜雨

客過中州愛物華沙隨城外氣清嘉
輓轡轉井晨澆菜

榻揆開田午種花

地產木棉工人但呼為花今其下種時也

色映酒壚三尺

紆聲和牛鐸四輪車空傳杞宋遺風在喬木何曾屬世

家

贈正華長老并序

去睢州城北十里道旁梵宇俗呼鐵佛寺持住長老

吳人也自言蘇州嚴墓李氏子少依巨德禪師記別
法名正華康熙庚申渡江北遊將赴五臺禮文殊瑞
像一夕經此坐道旁臥鐘下諦視則李正華姓名在
焉恍然悟前生之為行脚僧也茲地舊有佛廬明季
燬於兵火遂發願募化銖積寸累經二十餘年乃薙
草開林凡為殿四重莊嚴像設廊廡周遭僧寮及庖
湏之所共六十餘間仍以餘金買常住田二頃飯南
北往來緇眾今寺成而年老矣余觀而異之為詳記
始末并贈以詩

曾為行脚此經行聚鐵依稀鑄姓名重向荒村投一宿
忽從古佛證前生斧斯荆棘還初地海湧樓臺現化城

用盡萬金殘債了結踟依舊聽鐘聲

伯牛岡在杞縣城東上有冉子廟地非孔道行人罕有過而問者

垂鞭來問伯牛岡田叟扶犁過我旁指點人烟最深處一村新柳似鵝黃

重至陳留縣齋與許不器話舊二首

小許移官去回頭十四年

乙亥秋許霜岩出宰茲邑邀余同來留此兩月故人

今宦此古義兩殷然種樹添新蔭開池得美泉重來娛老眼光景勝從前

不料衝煩邑衙齋乃爾閒簿書神不滯交友性相關却餽安余素居貧諒汝艱一杯渾暖熱相顧慰衰顏是日大風

甚寒

大雪暮抵開封湯西崖前輩留飲學署二首

二月梁園雪春風特地寒行防街路滑到及酒升寬物色符清望交情稱冷官庭花經手植何惜借人看

一代文章伯中原桃李陰青春聊作伴白髮莫相侵與國培元氣於公識苦心人知讀書貴土價比黃金

徐大來太守送黃河水

汴俗多鹽井黃流遠不侵兩牛煩重載斛水抵兼金澹泊知官味清涼鑒客心飲河還自晒滿腹恐難禁

雪後發汴城

三日大梁住北風吹不休朝來開霽景擬上渡河舟此

地多賢主吾生感舊遊吹臺桃柳色臨老重回頭

渡黃河

地勢豁中州黃河掌上流岍低沙易涸天遠樹全浮梁
宋回頭失徐淮極目收身輕往來便自歎不如鷗

延津城北望太行山

河孺一小縣傳是廩延城野燒痕猶在沙田廢不耕民
謠思樂土客飯記荒程指點鹽車路千峰馬首晴

早過淇縣

高登橋下水湯湯朝涉河邊露氣涼高登橋朝涉行過
淇園天未曉一痕殘月杏花香

渡淇水

昨日渡衛源今朝涉淇水出山雖異派相望不百里遊
子中原來黃流混混耳忽然鑿毛髮顧影落清泚風塵
有鰲顏夫豈水汚爾從衰旋得白正坐不知止逝者方
如斯於何觀止理寓形忌太潔外垢庶可洗

鄴下雜咏四首

湯陰城外千楊柳密罩征鞍過相州中有一株柔可愛
勸人繫馬拂人頭

一賦何當敵兩京也知土木費經營濁漳確是無情物
流盡繁華只此聲

頑礫粗礪少硯材詞人陳跡散如灰兩家搏土殊多事
曾範三臺舊瓦來

一月寒禁幾信風初從河北聽靈靈
老夫準備看花眼
半日停鞭住鄴中

是夕雷雨

雨後發豐樂鎮渡漳河

雷雨已過朝復曠
早桃欲花烟滿村
夢中似聞簷滴響
渡口微覺河流渾
青山濛濛作雲氣
白浪滾滾留沙痕
滏陽北望三十里
舊事過眼徒誰論

襄與許霜岩過此有芰荷香裏到磁

醜渠詩并序

磁州在漳滏二水間
大興蔣侯來知州事
始至相度地勢慨然思復西門
豹史起之舊謀於州之士民咸慮勞且費侯獨違群議毅然為之醜滏陽河為渠以

灌城南北渠之廣不過一丈深半之曲折通流建閘以驗盈縮旱潦有備蓄洩以時行之十年開稻田數萬頃歲收數十萬斛初以為不便者後皆帖帖謂侯之惠愛斯人惟斷乃成也侯名擢字試可余未識其人過其境聞父老之言有古循吏之風焉作詩以俟采風者

一州頓復西門績
南北醜流引滏河
綠樹成陰茅屋少
清渠夾鏡稻田多
年深漸欲孳魚蟹
利美兼宜植芰荷
他日誰裁溝洫志
吾詩或可當絃歌

題邯鄲呂仙祠壁

百念全消一老夫
神仙不信信浮屠
直饒贈枕成何用

鼻息如雷夢已無

臨洛關

臨洛關前春水綠草色平鋪接沙麓戍人閒雜老農耕
拾得前朝戰場鏃

自裕禪店騎驢至沙河

遙遙沙河城晶晶堆均白驢耳露雙尖驢蹄深一尺

鴉拾粒行

牛前仰而犁鴉後俛以拾牛豈為鴉耕鴉因牛得粒農
夫呵牛長苦饑不如鴉群飽食東西飛

渡泚水有感於張陳事

泚河直下常山郡誰遣當年竟不流此事終留交道恨

萬屍填塹兩人仇

上巳趙州道中二首

幾日冰開合餘寒勒柳條

十一日前中州已見杏花而邯鄲以此柳未全綠氣候之不

同如水濱遊女少閒殺趙州橋

平原留故里牢落幾人家客過誰澆酒僧來且喫茶

與張昆詒時宰新樂

惠好自兒童相看忽老翁以君三歲長與我兩心同書
畫性成癖絃歌聲可風桑榆須早計歸路免西東

定武道中

積雪春猶潦連朝釋凍痕鶯花何太晚榆柳不勝繁貫
酒中山市騎驢代北村祗愁風色惡回首太行昏

堯母泉在慶都城南源發于平地四時不涸環
城數十里間居民頗獲其利

禹貢遺風興壤先帝鄉耕鑿故依然繞城半食蒲荷利

源在南鄉一眼泉

道旁石碑稱堯
母鄉第一泉

保陽城西望落翮山

不斷羊腸麓東來万馬趨數峰銜落日此路出飛狐

狂風行

碧天杲杲日正中萬竅突發顛狂風塵沙滂勃晝冥晦
瓦礫旋轉隨枯蓬使人口吻不得張耳目成盲聾馬牛
來往紛憧憧問之不辨西與東是時二月初柳條舒綠
桃將紅胡爲噫此不平氣春行秋令母乃違天公我行

邂逅偶相值墨守未易當輸攻心如混沌一不鑿外感
欲入何由通適來日無影適去塵無踪盡收衆籟入橐
籥仍以一寂還虛空

清明前三日重直 暢春園觀桃花二首

煖烟晴靄互交加散作高低遠近霞行盡人間冰雪路
又來天上看穠華

已逢蛺蝶未聞鶯閏歲春遲倍有情畢竟鳳城花信準
早桃開候近清明

同年王樓村招飲白丁香花下

我從鄉園來不看鄉園花輸君京洛住久客還成家一
株丁香香高卑趁檐牙曾經上畚種旋發春來葩獨抱

冰雪姿亭亭遠塵沙良辰醉其下酒美殺核嘉夕陽轉
庭西人影花交加我鬢已半白君鬢亦漸華自然法眼
淨維摩經遠離塵埃得法眼淨不被紅紫遮為歡出邂逅所戒非窮
賒後漢仲長統傳論楚楚後漢衣服戒在窮賒

閏三月朔與德尹同直內廷次東坡五月一日
轉對韻

冠壓華顛帶繞腰重來心跡負耕樵僦居未穩連宵夢
接武還同隻日朝上苑花開如見笑故人酒熟例相要
殘年果踐歸休約擊壤猶能頌帝堯

苑東移居與同年汪紫滄同寓紫滄有詩和荅
三首

近傍名園遠去郊無多屋宇半編茅春蠶慣作同功繭

癸未以後借紫滄下榻自怡園社燕來尋舊識巢景與征衫隨日換官

隨手板幾時拋卜隣絕勝清漳宅蛩駟相依剩素交

茫茫人海此居停萬斛風埃兩葉萍草色堦除晴不掃

槐陰門扇晝長局同槽廐馬無蹏嚙典謁家僮互使令

怪底羣情皆帖妥多緣君與我忘形

西苑鶯花幾閱春憶初伴直只三人揚春園向未有直廬癸未正月三日

余與聲山紫滄始奉名入直後遂為例何堪夢覺傷存歿或恐詩成泣鬼

神時家聲山甫下世炳燭餘光銷晚境青雲岐路失前

因搏沙放手終同散東坡詩親友如搏沙放手旋復散敢向蘆廬認主

賓

同年佟淵若學士遊西山歸出示見寄二絕句
次韵奉答

浮嵐暖翠望難分忽在新篇贈白雲
賴是愛山同有癖
夢為麋鹿也隨君

西山何似西湖好欲問知章借馬騎
今日烟波重到眼
去年曾和卷中詩
去年春杪與淵若西湖唱和

題顧桓吳江送別圖為紀可亭學博賦
舟移碧草綠波岸人別曉風殘月時
此景此圖誰會得

江郎賦筆柳郎詞
閏月十四日西苑送春二首
九十春光百五賒
綠陰陰處雨斜斜
多情裂帛湖頭水

長替東風掃落花
老去春遲願竟酬
多添半月踏青遊
人間何處無歸路
也被宮鶯喚少留

閏三月二十一日蒙 恩召入淵鑒齋乘舟至
瑞景軒蓋珠院露華樓徧觀各種牡丹恭紀四
首

宣喚欣承異數加
高從銀漢泛紅槎
行陪閨苑神仙侶
看徧春風穩重花
穠淡何心隨造化
丹青難貌是韶華

先一日傳示牡丹圖譜
梅檀別殿分明到
只作華胥好夢誇
艷極真宜過雨看
枝頭蕭蕭尚朝寒
盤盃向背開瓊扇

瓔珞高低現寶鬢
白日光中雲五色
明波濯處錦千端

天工頃刻呈新瑞點出靈砂九轉丹

萬卉千葩未覺稠掃宮老監記牙籌薌林不斷通三島

花海無邊際十洲佳氣茵茵蒸作霧餘霞縹緲結成樓

蓋珠一本尤奇絕徑尺重臺兩並頭

瑤階鈿砌望迴環映徹層層着色山御譜新標題品

外花名凡九十餘種佳名微別淺深間心如草木春知

閨天並君王霽在顏一片爐烟成百和袖中攜得國

香還

寓庭槐

庭隅雙槐樹手植知何人自我來此居婆娑忽經春初
看兔目綻漸布綠葉勻高處稍出牆密將遮比隣以茲

尋丈地無窮寓清新千章豈不多取蔭及一身閱人如

傳舍脈脈還傷神

四月二日 恩賜櫻桃恭紀十韵

燦燦華林種離離朱實香熟常先夏果貢不待炎方磊

砢初垂樹勻圓正滿筐珊瑚駢火齊沉瀝和瓊漿露帶

枝頭潤盤登葉底涼鳥鵲珠愛赤蜂釀蜜羞黃櫻桃一名櫻珠

崖一名昨憶西湖獻去歲初夏上駐蹕今來上苑嘗賜

珍蒙見及飽食感非常配笋厨空勅探花宴屢張唐時宰相

有櫻笋厨進分甘誰得似長侍 聖人功

題孫書年松下清齋圖孫善山水近亦供奉畫苑

自從月給官倉粟辜負園中鴨脚葵思作散仙猶未得

更思成佛問何時

西苑 賜觀秧田恭紀十二韻

帝籍非千畝農祥視一畦初聞朱果熟旋見綠針齊料
節栽花地開醜灌稻溪自天知稼穡率土動耒犁檻
外雲生岫簾前雨作泥膏腴隨廣狹脈絡就高低剡剡
浮金淑葱葱夾玉隄好風垂柳下斜日畫橋西多稔占
豐稔維魚兆畢圭甸師行不到勾盾典曾稽入侶金鸚
鵝歸尋木駃騠自慙輸布穀猶解勸耕啼

四月二十七日 召入無逸齋看新竹恭紀十

二韻

地闢琅玕陽天通箭栝門烟霄連別苑雷雨過前軒藪

藪風開籜洄洄水注根移栽初尚淺培護久能繁情筍
寧充饌抽梢盡出藩幾年成翠幙一徑轉蒼垠潤滴莓
苔砌高扶薜荔垣涼陰清有氣新粉淨無痕直節人皆
見虛心道亦存律堪調鳳吹名豈愧龍孫好報平安信
休辜長餐 恩親從天上看 不羨白沙村

題王麟昭桐陰撫琴畫扇

暑殘涼早雨餘天人坐桐窗晝寂然百尺清陰三尺水
秋聲先上七條絃

午日西苑直廬賦雨中榴花

小院盆榴樹花時帶雨鮮施朱何太赤似火獨能然白
髮違佳節丹心感盛年蒲葵方滿眼此本定誰憐

敬業堂詩集卷三十五



